

高平縣志

知高平縣事龍汝霖纂輯

建置第二

九仞之城自鯀興之漢後鑿龍首之士以城長安赫連勃勃蒸土用錐以城統萬取堅也至吳羅城爲亞字形而唐裴行儉之城碎葉亦紆環以詭出入宋藝祖之城汴筆爲蚓形時苦以爲紆曲迨蔡京廣爲四隅而金礮所擊皆碎始服其規制焉後世郡縣城興築無常請帑不易自乾隆十年部定各省城工千兩下率用民力而公功力役均矣泫氏故有城周烈王七年晉趙獻子城泫氏始此在王報

高平縣志

卷一

建置

一

村今猶曰舊縣北魏永安中置高平縣治高平城未詳所在府志曰在陵川云蓋州故城今米山鎮唐武德初置天寶間廢今縣城宋開寶六年縣令楊咸弼築然土城金天間王庭直擴之周四里高二丈五尺池深一丈東門曰東作南曰南薰西曰西成北無門明嘉靖時劉大實益以敵樓四敵臺四十隆慶時劉堯卿復增角樓敵臺濬濠深二丈廣如之靖四方更增高厚各五尺萬曆時冀南道楊應中請整以輒巡撫魏允楨疏於朝知縣馬從龍王省身先後董其役城高三丈五尺女牆高十之一濶一丈二尺延袤一千三百有三丈堞口一千八百有九更舖五十有

二城樓四角樓四增築甕城三許安遇復建西南兩關閣
門崇禎時魯光國增三門弔橋其因仍補治則弘治時楊
子器隆慶時李楨 國初順治朝范繩祖康熙朝梅建雍
正朝甘士瑛乾隆朝蔣永式周宣徽咸豐朝梁大鵬毛鉞
同治朝單寶書相繼修治之蓋百里分尋丈而任其役者
也

自漢以來三公所居曰府九卿所居曰寺後曰官舍曰公
廨曰公署曰衙漢何並守潁川妻子不至官舍鮮于冀守
清河作公廨唐顧況有宛陵公署記李聽葺邠州衙廳是
已縣署固司牧者進思盡忠退思補過地也可不修飭與

高平縣志

卷一

建置

一一

然昔以示尊嚴今則官侵夫帑入而橐已乃以鑿鼓驅諸
民而侈張其值僞爲籍以抑折後尹償之雖十年無免者
不然則視若傳舍任其傾毀不一惜亦巧宦之習也署直
城北宋縣令楊咸弼所營繕明洪武時縣丞潘珪永樂時
知縣李規嘉靖時王準劉大實衛東吳傅思明萬曆時張
居仁劉應召天啓時喬淳崇禎時魯光國 國朝順治間
范繩祖康熙間白良玉宋思陟乾隆間傅德宜嘉慶間王
元楸咸豐間梁大鵬袁繩武同治間單寶書復因其舊葺
之同治五年余復營園於署東有記記曰余治茲之明年
政事稍暇南迎板輿苦署東小園荒穢不治無以自娛以

娛吾親也爰於園之西北新闢三楹曰延暉閣將爲吾兩
老人頤養之所東曰對床聽雨軒則溥霖湛霖兩弟于焉
遊憩延暉閣之南有齋曰甃勤爲課子室兒子紱壽母以
童年而嬉戲也復南爲觀稼臺東睇平疇省春作秋刈之
勞朝餐暮殮有餘愧焉迤南曰吟窩狹小不能三人旋余
吟嘯自若不復知此生爲羲皇爲塵世也再南爲寄巢人
生如寄甯獨官舍如傳舍哉寄巢之北爲定香池時當暑
雨清風荷柄亭亭如蓋余與友人觴酌其上必饜醉乃止
復北則翼然中峙曰聽松亭松枝蟠虬濤聲沸耳聽訟之
暇坐卧以之俯念陶令徑松未必能或過也迤北窟室曰

高平縣志

卷一

建置

三

藏春塢人之則夏涼而冬溫與吾民穴居土風將毋同極
東復新闢一室爲懷湘舫風晨雨夕時與孺人弱女坐語
移時恍置身瀟湘間且以志余雖久宦并土未嘗一日忘
歸耕湘上也夙無宦情聊藉吏隱進則勤勤教養與小民
同其憂退則願侍吾親與諸骨肉友朋同其樂因取范希
文語顏其園曰後樂云 縣丞署在堂皇東主簿署在堂
皇西空倉堡巡檢司署在老馬嶺長平驛丞署在長平喬
村驛丞署在喬村今俱裁廢縣衙東爲庫東南爲典史署
更東爲外委宅縣衙西爲獄西北爲常平倉凡十九廩爲
楹六十七教諭宅在城東南訓導宅更居其南行臺居其

西故宗程書院也東則文廟在焉察院四一縣治東一南關一長平驛一喬村驛布政分司在縣治西按察分司在書院巷理刑公署在雙桂坊公館三一南關一馬村鎮一換馬嶺陰陽學醫學皆在縣治前由察院至醫學今俱圯僧會司昔在瑞雲觀今改崇果寺道會司在城隍廟留養局七一南關廂一米山鎮一寺庄鎮一河西鎮一喬村驛一店上村一馬村鎮養濟院舊在縣治西雍正初徙南關增立普濟堂今皆圯

旌善亭在譙樓東北圯申明亭在譙樓西北者圯在馬村鎮者存考釋名云亭停也人所停集也漢循秦制十里一

高平縣志

卷一

建置

四

亭亭有舍若李廣宿霸陵亭下息夫躬寄居丘亭是也邊曰亭障驛曰郵亭市門樓曰旗亭在府者曰都亭在部者曰下亭有邑聚曰鄉亭皆取停集之義至宋有榮鄉豐樂諸亭則又爲遊集之所明洪武立申明旌善二亭令民有善惡則書之訟之小者里老於亭剖決焉有私毀亭舍塗抹姓名者罪如律 國初猶申私拆申明亭之禁則祖古人表宅里畫衣冠遺意而今亡矣

莊子徐無鬼謂魏武侯曰君亦必無盛鶴列於麗譙之間注云鶴列鐘鼓麗譙高樓也則譙樓之設周末有之漢趙充國爲塹壘木樵顏師古曰樵譙同謂爲高樓以望敵至

南朝有端門鼓漏景陽樓鐘隋唐殿庭皆有樓以置鐘鼓而宋張詠知成都郡樓鼓漏必分明則時平寄軍令於鼓漏矣邑譙樓 國初燬於火知縣白良玉新之復圯余重修置鼓磬焉爲之碑曰署前譙樓自康熙朝田生白公修後迄今二百餘年雨剝霜毀塵泥滲漉其橫檻高甍剝側庸庀勢幾圯矣余視事既有年修舉廢墜獨力捐官俸以復其舊土木工役不以官值不忍累吾民攤派之苦與夫發召之勞也譙樓之設伐鼓下漏防奸宄而節昏昕由來舊矣自狂寇竊發兵燹幾遍天下狐鳴小醜釀成燎原小民狎於承平未諳古人守助之義桴鼓一鳴輒相顧失色

高平縣志

卷一

建置

五

內亂外訌陷城屠邑相踵接豈運會之適然與抑詰奸禁暴防亂未萌之法不習於素與夫大盜之興恒始於小盜涓涓勿壅終成江河是樓也鈴櫜相警先靖盜源合周禮掌夜之遺制裨于邑顧不鉅哉始役于同治五年二月葺功於六月費青錢五百餘貫命邑紳申國英緱道淵郭廷弼吳清林董其役監修者則教諭黃君維墀訓導曹君琳城守外委員君蘭典史李君方華也

郡邑之學曰書院始於宋曰白鹿洞曰石鼓曰應天曰嶽麓曰嵩陽曰茅山所謂六書院者也夫古者鄉舉里選惟取經明行修自西漢賢良令對策東都孝廉令諸生試家

法文吏課牋奏遂開後世科舉之習唐以詩賦取者曰進士以經義取者曰明經其時權德輿已病其不能通經謂爲本末俱喪至宋王安石命呂惠卿王雱創爲今之經義頒式行之至元祐間中書省厯言其弊而安石亦曰本欲變學究爲秀才不謂變秀才爲學究也是作俑者亦旣悔之矣明初定科舉法仍仿宋經義爲之排偶曰八股三年大比以試諸生士非此末由自進一時僥倖之徒以剽竊章句爲能掇巍科而躋顯仕學者以其便己也循之至數百年而學校陵遲耻尙失所故王安石新法行而王澤竭新義行而人才滅議者至比之洪水猛獸甚之也高平書

高平縣志

卷一

建置

六

院廢者屢矣今書院曰宗程在文廟西道光四年知縣李聯蒙建蠲銀一千二百兩有奇紳輸三之一餘則十年分攤之官者也同治五年余重修有碑碑曰昔程明道先生爲晉城令建鄉校七十餘區元大定中郭公質因時修舉後以兵燹廢明弘治間楊公子器力復之在縣治者四在村者三十六治之西偏曰正蒙社學者其一也嘉靖間孫丞應奎易名曰晉城書院爲邑書院之始訖今訪其故墟而文獻漸滅未有能指其遺迹者矣 國初康熙朝梅公建以晉城書院之頽廢也擇於學宮西創爲宗程書院旋亦就圯乾隆初邑紳陳潤太等更建一區居宗程書院南

陳公封舜請於巡撫命名崇正後所稱南書院也閱十餘年傅公德宜以其簡陋復葺宗程書院易額曰崇正南書院則兩地而俱存未幾毛公改崇正書院爲行臺南書院遂荒而不治道光初李公聯蒙欲仍故基而新之籌其費與初構等爰於迤西別購民舍得三十八楹齋室講舍庖湏之屬畢具復以宗程舊名名焉而南書院後創爲節孝祠此吾泮書院廢興移徙之所由也李公距今不遠是院復傾敗荒蕪不可居余承乏斯邑課士之暇怒焉心傷與邑紳申國英緱道淵郭廷弼吳清林謀計其需直青錢三百緡而縮遂捐俸獨任諏日鳩工命諸紳董其役不糜民

高平縣志

卷一

建置

七

財不假官工兩月而卒事余爲此役非敢抗希先哲亦願習于斯者念命名之非偶敢學篤行母汨于聲利詞章之習蔚爲儒宗度不負修舉廢墜之心後之官斯土者尤無忘鼓舞振興之云爾

宋茅山書院天聖時賜田以贍諸生張洽爲白鹿書院長凡養士之田乾沒於豪右者復之元時州縣皆有學田以餼師生餘租用刊書籍司以書院山長爲書院膏火所自昉宗程書院自乾隆時陳潤太諸人輸銀三千二百五十兩於當商歲以一五爲之息始定內課生童十人月廩銀九錢外課十六人月廩銀四錢道光時文廟工竣贏錢一

千緡復貰諸當商歲論息以一分增內課生三人月廩錢一千二百內課童三人月廩錢六百外課童二人月廩錢四百同治四年余復以廉俸銀五百五十兩蠲之當商歲仍以一五爲息增生童內課五人外課五人月廩如初月之三日爲官課縣尹主之扃試而給以酒食十三日二十三日爲館課院長主之課凡獎銀一兩九錢受以高下爲差月廩蔬菜銀三兩點心銀一兩二錢而院長之脩金百二十兩膳金六十兩門役膳夫之稍食均取給焉不足則縣尹益之無慮百數十金云 郡書院曰體仁以銀七百五十兩貸諸邑之當商息則月取十之一四三月齎諸郡

並輸不敷銀十一兩五錢則藉補於邑書院者也省書院曰晉陽始以銀五百兩貸諸邑之當商月收息十之一後益三百兩歲收息十之一冬夏齎諸省更輸膏火銀二十八兩五錢二分九釐則又取資縣尹之官奉皆從贍學田土而推廣之者也

邑有社學始於明道程先生令晉城建鄉校七十二區社學數十行縣時親爲兒童正句讀元郭質修舉五十九里而復廢明楊子器復其半徘徊中太魏庄陳壩勾要石村建寧王庄王何永祿王報義庄釜山得義楊村米山朱庄趙庄馮庄南庄龍尾沙壁石末野川回山馮村古寨東宅

宰李河西叢桂仙井李門丁壁董寨孝義立者凡三十六
而縣治更增其四久而亦衰萬厯中楊應中劉應召相繼
舉之康熙時梅建修其七乾隆時傅德宜增其一於程子
祠余下車則義學存者僅節義坊一區餘皆鞠爲茂草矣
同治四年余逐淫僧而移建義學者四曰新庄曰圍城曰
小川曰韓庄同治六年余督諸社力建之一時復增立義
學百十有七區一雙桂坊一趙庄西里秦莊東山村凡二
一趙庄中里南庄張庄凡二一米山東里本鎮下馮庄上
馮庄凡三一米山西里一米山北里一米山北里一朱庄里一詩村南
里一詩村北里一韓村里一南庄中里一南庄西里一裴

高平縣志

卷一

建置

九

泉東里一龍尾里本村侯庄村凡二一平頭里本村寨平
村凡二一石末里本村龍泉村凡三一沙壁里一雙井里
本村丁壁村凡二一孝義里本村石嘴頭凡二一郭村里
本村董寨祁寨官庄村凡四一董寨里一晁山里本村凡
二一城北里本村馮庄凡二一李村東里北李村南李村
響水坡凡三一李村西里南社北社凡二一徘徊南里南
鎮北鎮凡二一徘徊北里一長受里一團池南里三角村
凡三一團池北里一勾要西里一石村東里一石村西里
東石村凡二一勾要東里一魏庄西里一陳壩南里一陳
壩北里一建寧前里一建寧後里一府下里一玉井里唐

庄梨園村凡二一神山里一馬村里一唐安里一東宅里
一仙井里一河西東里一河西西里一仙井南里一李門
東里義庄東李門凡二一李門西里朱家庄牛庄凡二一
叢桂里一劉庄里一龍渠南里一龐村里本村川起村北
蘇庄下韓庄凡四一宰李里一北陳里本村朴村凡二一
田山里周纂村凡二一城西北里一臨丹南里箭頭秋籽
村凡二一臨丹北里石門企甲院凡二一王何里一王降
里一永祿里一永祿北里昔陽村望雲村凡二一楊村里
本村南陽村凡二一西社里一野川西里東溝村皇王頭
凡二一草方里一寺庄東里一寺庄西里一王報北里一

高平縣志

卷一

建置

十

高良東里本村李家河釜山村凡三一原村里一通義里
一馮村里本村上董峯凡二一璩庄里西溝韓庄凡二夫
窮鄉荒僻之壤子弟目不識詩書習爲獷悍悖禮犯義之
事愾然爲之而不顧昔晉富商韋藩木犍以過於朝而曰
雖有澤車華服不敢與士君子齒今俗賤士而貴商文學
之士反不得齊於商賈民質之開敏者挾貲財以奔走四
方欲其俯首入塾序輒指爲非笑余思以學漸易之重與
諸社長約曰師必歲首以衆舉防徇私也非舉貢生童及
學行兼者不預童必察曾三年與試者防猥濫也不取諸
本村而鄰村防爭競也窮民子弟無智愚胥入學不責其

束脩防貧廢也蒙師學徒無大故不得輒歸防曠功也社
事及里有訟獄蒙師不得與聞防褻亂也束脩或蠲畝收
穀或蠲錢取息否則用節省社廟演劇之資不再起攤防
苛派也蒙師有不稱隨時公議易之束脯按月以給防浮
支也殷實之戶另延師長不得與貧民同館防偏向也入
蒙先誦小學誦畢乃習他經防中輟也所頒各里小學蒙
師手錄而分授之譯以淺語令諸童環侍以聽事親行已
之要少而習焉其有犯上作亂者鮮矣是書內外僅二篇
不一二年可卒業穎秀者量而資入太學厄於貧者農工
商賈仍不害其謀生蒙養旣端上以追古之儒者下亦安

高平縣志

卷一

建置

十一

耕鑿而不入於奇袤其效不當在十年後哉

春秋時魯蒐于紅穀梁傳曰艾蘭以爲防置旃以爲轅門
以葛覆質以爲繫流旁握御擊者不得入典綦重矣漢則
天子講武曰獮劉郡守曰都試唐有歲校折衝之制明有
班軍番試之法非以耀武詰戎政也邑東關舊有演武廳
萬曆時以河患知縣劉一相徙建舊址西乾隆朝傅德宜
復新之增馬道並牙章臺焉員則外委千總一存城兵九
汛兵十八而隸於太原鎮標澤州營外委歲餉銀五十八
兩三錢二分戰兵月餉銀一兩七錢五分守兵月餉銀一
兩二錢五分春夏之季月支米倉斗三准銀三錢今胥不

足矣自唐改府兵爲彍騎歲糜金錢以養兵爲歷代國計之蠹尺籍伍符仍枵而不可用議者遂欲復府兵之制不知明之屯衛亦欲仿之而終不可復則兵之強弱亦在御之而已我朝開國兵雄天下世祖八年定名糧之額自提鎮至未弁以等差給其私侵冒者麗於罪其制防詎不宏遠哉至高宗以帑藏充溢革名糧而給養廉一時驟增名糧之兵六萬有奇已而名糧之隱占者如故仁宗成宗復以司農困乏思更其弊以漸裁之所裁僅六千餘人不敵所增十之一迨文宗在位十一年與兵事相終始中原糜爛竭天下之力不足奉將士賦稅不盡輦

諸京師兵將廩於官者剋減三成而將領益侵牟無已百費朘剝於兵名曰隊費兵至月廩銀七錢有奇仍不以時頒給之不得則倍息稱貸藍縷枵腹等於乞丐非窩娼賭以自肥卽負販升斗以求食能自振者不屑入伍惟游蕩無籍尪怯坐斃嗜食烏烟者流始濫充焉而大將以下左右使令至百工色藝廝養臧獲無非占兵籍者平居雅步自喜一聞校閱則挪東補西金鑄旗鼓有若兒戲而分守塘汛之兵尤筋力弛緩一孺子得而驅懾之值征調則惶泣無色故自盜弄潢池朝廷以虎符征天下兵臨期雇募或以三五抽調於塘汛兵將不相習兵與兵亦不相知

恒不足當一戰矯之者則召募豪民以爲勇費復以億計所養非所用所用非所養而歷年糜餉億萬以豢之者若洩諸尾閭此何爲乎然則籍民爲兵之制旣不可行於今日欲強兵以建威而銷萌非汰冗羸革虛冒禁培克併口糧不治其要尤自遴將而選鋒始

說文曰燧表候也周有驪山之烽漢制十里一候備邊曰檣寇至晝則燔燧夜則舉烽隋唐有舉二烽三烽四烽之制凡候相去二三里開元時以邊隅無事量停近畿烽二百六十所日惟初夜舉一炬曰平安火今汛立煙墩猶其遺制邑汛凡六南關汛縣南廂南里南陳汛縣南二十里

高平縣志

建置

卷一

十三

喬村汛縣南三十里寺庄汛縣北二十里長平汛縣北三十里鴉兒溝汛縣北四十里汛建墩臺五望樓一營房三汛凡兵二名

縣設快手八名民壯屢裁爲三十五名今更爲三十名介在兵民間役而廩於官者也考快手之名起於劉宋王鎮惡傳有能細直吏快手二千餘人建平王景素傳復有荆楚快手明崇禎時亦議增快手則若今行師之親兵也民壯在宋爲白芴子多剛縣夷爲寇用白芴子兵破之明弘治朝立僉民壯法有里僉五人二人之制有司訓練遇警調發而禁役占放買之弊不願則上直於官嘉靖時更增

其額復申私役雜差之禁或曰機兵則若今之團勇也後皆役於官 國朝制與營兵合操今霜降日知縣偕武官校閱民壯營兵於演武廳亦告朔餼羊之意然聊飾觀聽於一時平日偕快手各役惟司勾攝供儀衛與立制之初意悖矣

團練使之名見於唐罷於楊綰然以之判觀察使安民爲上考懲姦爲中考得情爲下考則非專總戎團矣考團練之初亦權輿藉民爲兵之制周廣德宋開寶曰保義軍弓箭手宋自夏人盜邊詔諸路刺義勇號四十餘萬而不足遏其鋒熙寧保甲行而弓箭社廢亦勢之所趨也金人入

高平縣志

卷一

建置

十四

寇令諸路團結忠義以禦之或曰義丁曰把截將曰山水寨在太行者爲八字軍名目尤多其時或廩給之或免家業錢或捐其租賦卒無救於亡元曰毛葫蘆兵明曰土兵曰狼兵曰鄉兵始以籍後以募萬厯時鄒維璉徐九翰崇禎時張慎言米壽圖皆極言其害惟 國朝則嘉慶以平教匪同治以平髮逆兼用之三晉大吏狃於平賊之利又恐軍興之乏謂不費斗糧坐致勝兵千萬羽檄星下督責州郡養練勇結民團諸邑歲糜民錢數百萬而晉人怯懦事有緩急類無益於用高平故豢練勇百有四十仰給縣尹縣尹大紕言於上調歸澤州元字營今長吏以邊患未

弭更檄民自爲練而邑民故以遠賈富今各行省糜爛貲本蕩爲灰燼坐是窮困練多則費不給練少則守不振且慮一逼烽燧民逃餉匱勇益變故萬端余故力持之歲爲民省金錢萬餘緡而民團清內奸少糜費則爲舉行云夫喪亂未平誠不能不籌禦侮策然亦當權利害之重輕自文恬武嬉兵不足恃因藉資於勇所謂勇者有二有召募之勇有團結之勇召募之勇廩於官任征調者也團結之勇守其鄉不任征調者也其利害亦適相埒召募之勇聚則爲勇散則爲賊團結之勇良則清奸以保境莠則糾黨以抗官散則爲賊三省教匪之役蕺而勇丁變廣東英夷

高平縣志

卷一

建置

十五

之役已而髮逆萌是也莠則抗官河南之聯庄生殺自如山東之練首租稅不入是也然則如何而可曰得良將以領之訓練有方遣散得法則召募精得賢令以馭之上下相親恩威並濟則團結固亦如烏喙已疾使不至毒而已然則後患之毖又有旣乎哉

古者車曰傳騎曰驛楚子乘驛會師祁奚乘驛而見宣子亦曰遽子產乘遽而至皆以速也始猶兼乘傳晉侯以傳召伯宗田橫乘傳詣洛陽後則皆馬矣漢驛凡三十里一置唐如之唐制赦書日行五百里左降官日馳十驛以上宋時凡驛皆有倉明季令民養馬以應役曰槽頭而驛敝

裁驛卒而國亡 國朝歸諸官驛有丞乾隆七年裁在邊者曰臺站在郡縣者曰驛大臣出使命曰馳驛平日則賫章奏行文牘軍書急日可行八百里縣北曰長平驛南曰喬村驛故爲馬七十六匹馬夫三十八所夫七十八後屢增屢裁爲馬五十匹馬夫二十五所夫三十五歲支銀二千四百八十三兩二錢有奇馬凡日食豆倉升八草束二合槽棚諸雜色日准銀九分八毫馬夫日廩銀三分所夫日廩銀一分九釐有奇後裁馬三十馬夫十五其銀輸諸司以協濟岱岳史村普潤甘桃泓芝瑞石韓家樓李家溝諸驛咸豐間部議裁損馬乾三成及六分減平馬則歲支

高平縣志

卷一

建置

十六

銀四百五十兩二錢二分六釐夫則歲支銀七十五兩六錢所夫歲支銀一百七十一兩七錢四分四釐值小建則計日而減其銀仍輸司舖卒汰則州郡文書悉屬焉益以銀二十六兩有奇同治六年大吏以驛日疲累官不能支有復馬乾三成之請部乃允二百三十兩六錢二分七釐而減平仍如故云高平故爲僻壤軍興以來驛郵改道南北軍書往來如織重以使節之供億同寮之假道下至遊客輿台資緣書刺私橐商賈之貨財而至索夫馬索芻牧者月無虛日大軍一有調發尤橫恣騷擾辱僣毆吏誅求無已犒餼之餘贈以折乾驛傳蕭條州縣遂視同陷穽矣

諸急遞舖始於金泰和六年十里一置漢曰郵亭唐曰銀牌宋曰金字牌急脚遞縣舖凡八總舖玉井南陳喬村臨丹西陽范店雅兒溝舖兵三十三名名歲廩銀六兩咸豐年裁

周制立鄙食以守路野廬氏所爲設也後楚屬關隘設兵立塘曰守卡今日卡房亦曰窩舖所以詰奸使節過則司其迎送縣北凡十三曰王何里臨丹北臨丹南永祿里寺庄西寺庄東永祿北北王庄口德義堡泉則坡鴉兒溝二橋跑馬坪再北則長子東北凡五曰赤土坡池則口赤祥口黑土坡石坂坡再北則長治縣南凡八曰湯王頭唐庄

高平縣志

建置

卷一

十七

口北陳口老君橋小橋則許河口小嶺上南界牌嶺嶺毗鳳臺北壤有勞勞亭在焉明知縣李楨詩曰一箸千錢盡連及百里驚問中愁未了又見嶺頭旌蓋已苦送迎之繁也

鄉聚有堡猶州郡有城春秋時鄭人完守入保楚不爲害趙李牧守代邊匈奴入急收保數歲無失亡明盧象昇備大名撫鄖陽用山險立寨平原并村法以禦流寇 國朝嘉慶時堅壁清野之議行而教匪蹙河南近立堡砦而捻匪饑然則欲弭流賊之亂非并村置堡得人以完守之其能有濟乎邑堡則米山建寧玉井丁壁野川馬村唐安周

纂寺庄趙压換馬凡十一猶有宋時太行忠義砦遺意而險不逮矣

初學記曰凡橋有木梁石梁舟梁周禮司險知川澤之阻而達其道路春秋時過陳不梁單子謂其必亡以知古人利民之政纖悉必舉卽唐六典所稱天下造舟之梁四石柱之梁四木柱之梁三巨梁十有一皆國工修之餘皆所管州縣隨時營葺猶古制也五代時王周以定州橋壞覆民租車周曰橋梁不修刺史過也乃償民粟而治其橋自司空之職不舉民多病涉而橋梁之利虛矣廡南集賢橋順治朝邑人張鑒建今居人以土湮之無遺迹浮雲橋東

高平縣志

卷一

建置

十八

關外今更曰迎恩明萬厯許安遇建洪聲遠任大僚韋炳嗣營之然三就三圯范公橋南關外范繩祖建浚水橋南關外明李楨建 國朝李貞水復修焉兩朝令名合而符奇矣橫澗橋縣南三里楊道人建兩淮鹽院張翮甃以石老金橋縣南十五里喬村金驛丞建通濟橋縣南二十里明萬厯邑人許朝家建雍正時胡正履重修今仍圯許河橋在水村河龍溪橋在龍泉村南崇正橋縣西南十里明萬厯許安遇建洪聲遠任大僚繼成之迎恩橋周纂鎮北百子橋周纂鎮廣惠橋西周纂穿陽橋石末村永濟橋換馬橋縣東北四十里徑兩山間今圯

昔周公於洛陽爲陽渠秦李冰於蜀郡造百丈堰溝洫廢而渠堰之利益重矣漢時郡國賢守如召信臣恆濬渠瀆以溉田均水約以止爭唐時爲令猶得用留州之財賦開渠立堰故唐書地理所志興設爲多宋于諸路設專官飭守令以時浚導明洪武末開郡國塘堰凡四萬九百八十七陂渠隄岸五千四十八 國朝雍正初疏渠建閘 詔動正項錢糧有河道土方不得積河岸之諭而畿輔水利今猶賴焉高平居丹水上游唐貞元初屯留令明濟假領高平引丹水徑城疏渠築坊以便民汲今涸漲無時渠坊之迹荒矣水患近者城西倚山甚雨則水漂入城明知縣

高平縣志

卷一

建置

十九

劉大實築爲堤而土潰後李楨及李貞木各鑿濠引水而南之今壕復就湮唐安鎮石堤義民陳騫築縣城北郭公堤故名柳公堤以柳豸郭質先後築得名范公堤范繩祖築丹河石堤甘士瑛築今皆圯夫西北多山昔賢爭言水利今農政不修有司不復以畎澮爲心小民羣習于媮惰由是水日乾而土日積山澤之氣不通邑田常苦旱暵靈雨又以水澇爲憂恆受水之害而不獲其利余以暇循行阡陌輒思淤者濬之圯者新之豬蓄有資啓閉以法度夏旱秋澇不能爲病然軍興彌年輸將告竭民窮財匱欲興力役益不自贍矣無已惟歲度官用贏則度藏之積以爲

諸役費嗚呼安得如唐之租庸調以三之一存諸郡縣藉
資修築而興利除害也乎